

DEN AMBIENTE....

Fotos y Texto: Jan Poets

CHAYO TROMP LO STUDIA MUSICA Y SIGUI CU HONEYPOT NA HULANDA...



**** Cheyene "Chayo" Tromp**, joven talentoso guitarrista/cantante di **Honeypot**, a bay purba su suerte na madre patria Hulanda, na unda e lo bay sigui amplia den e mundo profesional di musica na HBO Rock Academy na Tilburg. Prome cu Chayo a viaha pa Hulanda, **Den Ambiente**, a realiza un entrevista exclusivo cu su persona. Chayo a declara cu e tempo a yega pa e cuminsa dal e prome stapnan pa bira un musico profesional. El a escoge Hulanda, debi cu e tin hopi amigo musico, di cualnan e lo bay forma e **Honeypot** nobo na Hulanda. Tambe el a haya hopi apoyo cerca su gran amigo White Mike, kende a encurashe pa bin establece su mes na Hulanda. Chayo lo bay studia "song writhing" na HBO Rock Academy y alavez trata pa cosecha e mercado hulandes cu **Honeypot**. "E oportunidadnan ta hopi grandi mes", Chayo a expresa, "esaki debi na e gran exito di Roger Peterson hunto cu Intwine, kende porcierto tambe ta su gran amigo. E meta ta pa forma e yabi cu Roger Peterson y Intwine na Hulanda. Manera ya ta conoci, Roger Peterson y



**** Hunto cu ex reina juvenil di carnaval, Abigail v.d. Linden, Chayo Tromp lo bay forma su bida na Eindhoven, Hulanda...**

Intwine a bira hopi famoso na Hulanda y Europa y esaki di mes ta habri e portanan pa musiconan y bandanan Arubano. E popular cantante y guitarrista a declara cu e lo bay forma su bida cu ex reina juvenil di carnaval, Abigail v.d. Linden, kende tambe lo sigui cu su estudio na Hulanda. Nan lo establece na Eindhoven. Chayo Tromp ta yiu di e conocida cantante y locutor, Aileen Croes y e conocido tocado di steelband Freddy Tromp. For di su 7 año, Chayo a ricibi un kuarta for di su Mama como regalo y den forma rapido e tabata domina e kuarta. Dia cu el a cumpli 13 año, tabata su Tata cu a regale un guitarra electrico. Cu e guitarra electrico aki, den apenas algun luna, ya Chayo a forma su propio banda juvenil. E pasion pa toca guitarra a crece y cu su 17 año, Chayo a forma **Honeypot**, cual banda el a bira hopi popular cu el a dicidi pa bay purba su suerte na Hulanda, pa asina conquista e mercado europeo y mundial. **Den Ambiente**, ta desea Chayo Tromp tur clase di exito y manera a priminti, **Poets TV** muy pronto lo ta presente na Hulanda...



**** Por mira claramente riba e caranan di e integrantes di Honeypot, cual ta encera tambe esnan invita durante e concierto di apertura di Digicel riba Plaza Betico Croes, cu nan lo bay sinti hopi falta di nan gran amigo musico Chayo**

Tromp. Porcierto e presentacion di Honeypot riba Plaza Betico Croes pa Digicel, tabata uno tremendisimo y nan a goza di e apoyo total cerca nan gran fanaticadanan cu e yobida aplaasonan...



**** Hasta nos muchanan tabata presente pa goza di Honeypot y yama ayoo na Chayo Tromp durante e anochi di bautiso na Black Hog Saloon...**



**** Famia y e gran fanaticada di Honeypot tabata presente na aeropuerto pa desea Chayo Tromp tur clase di exito pa su estudio di musica y tambe cu Honeypot...**